

# Lawatan Pengarah Pertanian Bandar ke SMK Mutiara



**Labuan, 16 April** : Pengarah Jabatan Pertanian seluruh Malaysia telah membuat lawatan ke Tapak Tanaman Program Pendidikan Khas Integrasi Sekolah Menengah Kebangsaan Mutiara WP Labuan.

Rombongan lawatan diketui oleh Pengarah Pertanian Bandar, Encik Mustapa bin umar bersama 30 orang Pengarah Jabatan Pertanian seluruh Malaysia.

Encik Mustapa berterima kasih dan mengucapkan tahniah kepada pihak sekolah yg telah melaksana aktiviti pertanian bandar dengan menanam pelbagai sayuran, buah-buahan dan tanaman hiasan.

Beliau mencadangkan agar pihak sekolah mengamalkan penanaman secara organik dan menyarankan agar guru dan murid mengikuti kursus penghasilan plant booster yang dianjurkan oleh Jabatan Pertanian WP Labuan.

**Berita Oleh : SMK Mutiara**



---

**Mesyuarat Agung Tahunan  
PIBG SMK Lajau Penghubung  
Silaturrahim**



**Labuan** : Mesyuarat Agung Tahunan PIBG Sekolah Menengah Kebangsaan Lajau kali ke-18 tahun 2019 berjalan dengan lancar mengikut agenda yang telah ditetapkan.

Tepat jam 7.30 pagi ibu bapa telah membuat pendaftaran di luar Dewan Mini, SMK Lajau mengikut kelas anak masing-masing.

Pada masa yang sama, kutipan sumbangan satu rim kertas A4 bagi satu keluarga turut berlangsung. Sebanyak 86 rim kertas A4 yang telah disumbangkan oleh ibu bapa.

Sementara menunggu ketibaan perasmi, penyampaian sijil kepada penceramah dan cabutan bertuah sesi pertama berlangsung dan disampaikan oleh Penolong Kanan PPKI iaitu Puan Noraini Hj. Sabudin.

Bermula jam 8.00 pagi, pengisian ceramah daripada Unit Pengurusan Farmasi, Jabatan Kesihatan Labuan iaitu Cik Wan Amira Atiqah bin Wan Omar dengan ceramah yang bertajuk "Kenali Ubat Anda".

Tepat jam 9.30 pagi, ketibaan perasmi Datuk Rozman Bin Datuk Hj. Isli telah disambut oleh pengetua SMK Lajau

beserta tetamu jemputan yang lain .

Seterusnya, sesi ceramah yang kedua daripada Unit Psikiatri Dan Kesihatan Mental , Hospital Labuan iaitu Dr. Ng Boon Seng.



Ceramah kesihatan oleh Dr. Ng Boon Seng  
Sebaik ketibaan Yang Berhormat di dalam Dewan Mini, SMK Lajau, nyanyian lagu Negaraku dan lagu Wilayah Maju dan Sejahtera berkumandang. Kemudian, iringan doa oleh Ustaz Muhd Zuraihi bin Razali.

Ucapan pertama daripada YDP PIBG SMK Lajau bagi sesi 2018/2019 Iaitu Encik Tapa Bin Jani, diikuti ucapan Pengetua SMK Lajau Encik Mohd Jamatin Bin Abd Latip.

Ucapan akhir, ucapan perasmian yang dinanti-nantikan daripada Yang Berhormat Datuk Rozman Bin Datuk Hj. Isli.

Selepas tamat ucapan, Yang Berhormat melancarkan gimik perasmian dengan meletakkan tapak tangan pada telefon pintar tab yang disediakan seterusnya video perasmian ditayangkan.

Tepat jam 11.15 pagi, pembentangan minit mesyuarat agung tahun lepas yang dipengerusikan oleh YDP PIBG. Pengesahan minit mesyuarat , laporan setiausaha dan laporan kewangan turut dibentangkan. Akhir sekali pembubaran AJK PIBG Sesi 2018 / 2019 secara rasmi oleh YDP PIBG En. Tapa bin Jani.

Bagi menghargai sumbangan AJK PIBG yang lepas, Penyampaian Sijil dan Plak disampaikan oleh Pengetua SMK Lajau Encik Mohd Jamatin bin Abd Latip,.

Pengetua menjalankan tanggungjawab sebagai pengerusi sementara dan mengetuai pemilihan ahli jawatankuasa PIBG bagi sesi 2019/2021 dengan memilih YDP dan Naib YDP.

Semua ibu bapa yang hadir sebulat suara mengekalkan jawatan YDP sebelum ini iaitu Encik Tapa bin Jani dan NYDP iaitu Puan Sarina bin Shaari.

Pengetua juga menyenaraikan pelantikan dalam kalangan guru iaitu Cik Nur Athirah Binti Abdul Rashid selaku Setiausaha dan Cik Noramira Asyikin binti Arun sebagai Penolong Setiausaha.

Manakala Cik Fazera Jane binti Rosmin dilantik sebagai Bendahari yang baharu bagi sesi 2019/2021.



Tetamu Jemputan merakam kenangan bersama semua ibu bapa dan guru

Dengan pelantikan Ahli Jawatankuasa PIBG sesi 2019 / 2021 tersebut maka sempurnalah majlis Mesyuarat Agung Tahunan PIBG kali ke-18 tahun 2019 Sekolah Menengah Kebangsaan Lajau dan semoga tanggungjawab yang diamanahkan dapat disempurnakan dengan jayanya.

**Berita Oleh : SMK Lajau**

---

## **Bengkel Anugerah Surau Imarah Sekolah-Sekolah (ASISS) 2019**



Labuan, 14 Mac 2019 – SK Rancha-Rancha (Sekolah Kluster Kecemerlangan) telah mengelola bengkel Anugerah Surau Imarah Sekolah-sekolah (ASISS) 2019 bertempat di Musolla Nurul Iman SK Rancha-Rancha.

Bengkel disertai oleh guru-guru Pendidikan Agama Islam SK Rancha-Rancha, penyelaras surau SMK Pantai, SMK Mutiara dan SK Membedai. Bengkel turut dihadiri oleh Ustaz Mohd Syahir bin Mohd Yusoff, Ketua Sektor Pendidikan Islam, Jabatan Pendidikan W.P Labuan dan Puan Midah binti Yusop, Penolong Kanan Pentadbiran SKRR dan Puan Rositah binti Abd Rahman, Penolong Kanan HEM SKRR.

Ustaz Syahir memaklumkan untuk ASISS, penilaian dibuat dari segi kebersihan, inovasi, aktiviti serta inisiatif yang diterapkan oleh pihak sekolah dalam usaha untuk mengimarahkan musalla.

Oleh itu, setiap sekolah yang terlibat akan menjalani sesi penilaian dan disenarai pendek untuk peringkat negeri dan seterusnya peringkat kebangsaan.



## Sukan Gimnasrada, Tarikan Baru di Sekolah Kebangsaan Sungai Bedaun



Labuan, 1 Mac : Seramai 80 orang murid Sekolah Kebangsaan



Sungai Bedaun (SKSB) menjalani latihan gimnasrada yang diadakan setiap hari sepanjang Cuti Tahun Baru Cina di Dewan Permata, SKSB.

Gimnasrada adalah gabungan gimnastik, erobik dan pergerakan kreatif dengan iringan muzik.

Menurut Jurulatihnya Cikgu Norlisa Rusly yang merupakan Guru Pendidikan Jasmani SKSB, kumpulan gimnasrada diwujudkan bagi memberi peluang kepada murid-murid mengetahui tentang asas gimnastik dan kelebihannya.

Selain itu aktiviti ini juga dapat mendisiplinkan murid kerana mereka perlu fokus dalam setiap pergerakan agar persembahan yang dilakukan kemas dan teratur bersesuaian dengan muzik iringan.

Sementara itu Guru Besar SKSB, Cikgu Dg. Sarifah binti A.Mahmod menyatakan gimnasrada merupakan bidang sukan yang baru diperkenalkan kepada murid-murid di sekolah ini.

Ia akan dipersembahkan sempena Kejohanan Sukan Tahunan Sekolah yang akan berlangsung pada 3 Mac 2019 di Kompleks Sukan, Wilayah Persekutuan Labuan.

*Pihak sekolah berbangga dengan komitmen yang ditunjukkan oleh jurulatih dan murid-murid yang menjalani latihan sepanjang cuti yang lalu. Begitu juga penglibatan Penggerak Ibu bapa dan Komuniti (PIBK) yang diketuai oleh Yang Dipertua Persatuan Ibu Bapa dan Guru (PIBG), Puan Wiwik Iswandari Sulaiman untuk turut sama mengawasi anak-anak. Malah mereka sanggup menyediakan sarapan sepanjang sesi latihan berlangsung". Cikgu Dg. Sarifah binti A.Mahmod.*



Cikgu Mohd Aizam Abdul Rahim (berdiri di tengah) bersama Puan Wiwik Iswandari Sulaiman dan Norlisa Rusly merakamkan gambar bersama peserta gimnasrada. Penolong Kanan Ko Kurikulum SKSB, Cikgu Mohd Aizam Abdul Rahim, berkata biarpun sukan gimnasrada ini baru diperkenalkan namun murid-murid cepat menguasai kemahiran.

Komitmen, disiplin dan semangat murid-murid dititikberatkan sepanjang latihan Gimnasrada dapat dihasilkan dengan jayanya dalam masa 2 minggu sahaja.

Pihak sekolah mengucapkan tahniah kepada jurulatih dan ibu bapa yang telah berkorban masa, tenaga dan cuti mereka semata-mata untuk memberi peluang kepada anak-anak SKSB mencungkil bakat dalam bidang ini.

Semoga gimnasrada terus diminati dan menjadi salah satu tarikan yang boleh ditonjolkan dalam kemenjadian murid SKSB.

Ayuh ! sama-sama kita menyaksikan persembahan gimnasrada dan memeriahkan sukan tahunan SK Sungai Bedaun yang akan berlangsung pada 3 Mac 2019, sebelah petang di Kompleks Sukan Labuan.

**Berita Oleh : Sk Sungai Bedaun**

---

# **SISC+ JPN Terengganu di Bengkel Teknik 12 Langkah Metodologi Kajian Tindakan W.P Labuan**



Labuan, 26 Februari : Seramai 9 orang SISC+ JPN Terengganu telah turut hadir dalam Bengkel Teknik 12 Langkah, yang telah dianjurkan oleh Sektor Jaminan Kualiti, Jabatan Pendidikan W.P Labuan semalam. Bengkel yang diadakan di Bilik Layangan BTPN telah dikendalikan oleh Puan Suriani Alland Rice Oxley, Pegawai SISC+ Jabatan Pendidikan W.P Labuan.

Bengkel ini dilaksanakan sebanyak 4 siri yang mana peserta adalah terdiri daripada Ketua-Ketua Sektor Jabatan Pendidikan W.P Labuan, Pengetua, Guru Besar, dan Pemimpin Pertengahan sekolah-sekolah di W.P Labuan.

Bengkel ini menekankan 12 langkah penyoalan sebagai teknik yang boleh menghasilkan satu kerangka kajian

tindakan dalam tempoh 2 jam.



Ketua Sektor Jaminan Kualiti, Puan Khaziyati binti Osman telah memaklumkan bahawa modus operandi penyebaran ilmu penyelidikan dan inovasi pada tahun 2019 ini dibuat secara penawaran atas talian. Tujuannya untuk membina akauntabiliti sendiri kepada Pasukan Kepimpinan Sekolah (SLT) dan Pasukan Pemimpin Pertengahan (MLT) sekolah-sekolah W.P Labuan.

SISC+ JPN Terengganu telah menyatakan rasa gembira atas perkongsian yang telah diberikan. Jaringan komunikasi SISC+ Jabatan Pendidikan W.P Labuan dengan JPN Terengganu bukan hanya mewujudkan interaksi nasional malah memberi peluang perkongsian pintar yang berterusan.

Para peserta telah melahirkan rasa puas hati dengan penganjuran Bengkel Teknik 12 Langkah ini dan berkeyakinan untuk menyediakan laporan kajian tindakan hasil kerja buat tugas mereka sebagai guru dan pemimpin sekolah.



Khaziyati dan Suriani sedang menerangkan penyediaan kajian tindakan kepada Guru Besar SK Pekan Satu, Puan Anita Syamini AP Azman.

---

**Panitia Bahasa Inggeris SMK Mutiara anjur Program “Round Table Discussion and English Language Teaching Forum”**



Panitia Bahasa Inggeris SMK Mutiara dengan kerjasama Sektor Pengurusan Akademik Jabatan Pendidikan Wilayah Persekutuan Labuan telah mengadakan “Round Table Discussion and English Language Teaching Forum” pada 29 Jun 2018 bertempat di Dewan Semarak SMK Mutiara.

Baca Lanjutan Berita ini di [Laman Web Rasmi SMK Mutiara](#)

---

## **SAS Juara Kejohanan Ping Pong MSSWPL 2018**



Jabatan Pendidikan Labuan telah menganjurkan pertandingan Kejohanan Ping Pong peringkat MSSWPL pada 24hb Februari 2018 bertempat di Dewan SJK (C) Chin Wen, Wilayah Persekutuan Labuan bagi tahun 2018.

Pertandingan tersebut telah melibatkan 10 buah sekolah menengah dan sekolah rendah di seluruh Wilayah Persekutuan Labuan.

Pertandingan ini telah diadakan bagi mencari dan mencungkil bakat para pelajar dalam bidang sukan Ping Pong. Maka, pertandingan ini telah mensasarkan kepada murid Sekolah Rendah dan Sekolah menengah di Wilayah Persekutuan Labuan.

Kejohanan ini telah mempertandingkan 2 jenis pertandingan iaitu kategori Perseorangan dan kategori Bergu yang melibatkan dua kategori iaitu kategori umur 12 tahun dan ke bawah bagi lelaki dan perempuan serta kategori 18 tahun dan ke bawah bagi lelaki dan perempuan.

Sekolah Menengah St. Anthony telah dinobatkan sebagai Johan keseluruhan bagi Sekolah Menengah dalam pertandingan ini dan mendapat 2 Pingat Emas, 2 Pingat Perak dan 1 Pingat Gangsa manakala Naib Johan telah dimenangi oleh Sekolah Menengah Kebangsaan Labuan dan tempat Ketiga dimenangi oleh Sekolah Menengah Kebangsaan Mutiara.

Sekolah Menengah St. Anthony telah diwakili oleh lima orang murid iaitu Jeff Lim, Lester Lim, Abdul Shafiq dan Winnie Lim dari kelas Empat Sirius dan seorang pelajar dari kelas Empat Orion iaitu Gloria Liew. Semua pelajar ini terdiri daripada pelajar tingkatan 4.

Dalam kejohanan ini Adik Jeff Lim dan Lester Lim telah memperolehi pingat emas dalam kategori bergu kategori LB18, manakala adik Winnie dan Gloria Liew memperolehi pingat perak kategori PB18. Dalam kategori perseorangan pula adik Jeff Lim memperolehi pingat emas, Lester Lim pingat gangsa dan adik Winnie juga mendapat pingat gangsa.

Menurut Jerry Totih iaitu jurulatih sukan permainan Ping Pong SAS, beliau berkata Pengetua SM St. Anthony, iaitu Puan Dona Undoh juga sentiasa memberikan galakan, sokongan dan dorongan kepada semua atlet sekolah ini. Galakan dan dorongan ini telah menaikan semangat para pelajar untuk mengikuti semua acara yang dipertandingkan.

Menurut pengetua SAS, Puan Dona Undoh telah menyatakan bahawa Kementerian Pendidikan Malaysia sentiasa berusaha memberi penekanan terhadap peranan sukan dan aktiviti kokurikulum di sekolah bagi melahirkan murid yang seimbang dari segi jasmani, emosi, rohani, intelek dan sosial iaitu selaras dengan inisiatif Pelan Pembangunan Pendidikan Malaysia (PPPM) 2013- 2025 untuk melahirkan modal insan secara holistik yang tidak hanya tertumpu kepada kejayaan akademik semata-mata, tetapi juga



penglibatan murid dalam aktiviti kokurikulum

Harapan pengetua agar lebih banyak lagi murid-murid SM St. Anthony menyertai pertandingan seumpama ini bagi mencungkil bakat terpendam dalam kalangan murid. Beliau juga amat berbangga dengan kejayaan yang dicapai oleh murid-murid ini. Majulah Sukan Untuk Negara.

**Berita Oleh : DK Suhana PG Tassip**

---

## Lawatan Pengarah ke SMK Lajau 2018



**LABUAN, 29 Jan 2018** – Kata-kata keramat “Pemimpin Berjiwa Rakyat” dan “Pemimpin Turun Padang” amat sinonim dengan pemimpin yang mesra dengan masyarakat di bawahnya.

SMK Lajau menzahirkan rasa berterima kasih dan bersyukur atas kesediaan Pengarah Jabatan Pendidikan Wilayah Persekutuan Labuan (JPWPL) En. Raisin bin Saidin berserta Ketua-ketua Sektor hadir ke SMK Lajau bagi bermesra bersama guru dan murid dalam perhimpunan rasmi mingguan sekolah.

Dalam majlis itu, Pengarah JPWPL, En. Raisin Saidin menyampaikan amanat dan nasihat kepada murid-murid agar sentiasa rajin menghadiri diri ke sekolah dan berusaha bersungguh-sungguh untuk menimba ilmu pengetahuan di samping mengamalkan budaya pelajar cemerlang dengan sentiasa menepati masa dan menghormati warga pendidik yang bersungguh-sungguh menyampaikan ilmu kepada mereka.



En. Raisin menyampaikan ucapan dalam perhimpunan rasmi mingguan sekolah bersama murid-murid.



Murid-murid tekun mendengar ucapan dan amanat daripada Pengarah Jabatan Pelajaran WP Labuan.

Selain itu, En. Raisin Saidin juga menyarankan kepada seluruh warga pendidik di SMK Lajau supaya mengamalkan pembelajaran Abad Ke-21 sesuai dengan PPPM 2013-2025 selari dengan arus pemodenan semasa.

Pada masa yang sama, guru juga diingatkan supaya sentiasa kreatif dan inovatif dalam menyampaikan wacana kepada murid-murid di dalam kelas.

Terdahulu, En. Raisin Saidin telah tiba di SMK Lajau seawal jam 6.40 pagi bagi sama-sama menyambut kehadiran murid di pagar sekolah bersama Pentadbir SMK Lajau yang terdiri daripada En. Mohd Jamatin Abd Latip (Pengetua), Cik Nor Ain Mohamed ( PK Pentadbiran ), En. Jasmi bin Sabtu (PK HEM), En. Dahlan Kassim (PK Kokum) dan Pn.

Noraini Sabuddin (PK PPKI) untuk menghidupkan budaya Program Guru Penyayang di sekolah.



Amalan Program Guru Penyayang menyambut kehadiran murid di pintu masuk sekolah.

En. Raisin Saidin beserta rombongan Ketua Sektor JPN WPL sempat merakamkan kenangan bersama warga pendidik SMK Lajau tahun 2018 sebelum mereka berangkat meninggalkan SMK Lajau kira-kira jam 8.00 pagi.

**Sumber Berita : SMK Lajau**

---

**Majlis Makan Malam Gemilang  
SEMELA 2017 dan Majlis  
Jasamu Dikenang**



**Labuan** : Warga pendidik dan kakitangan sokongan SMK Lajau gembira apabila satu Majlis Makan Malam Gemilang diadakan pada 17 November 2017 yang bertempat di Alfresco, Hotel Tiara, Labuan.

Majlis anjuran Kelab Guru dan Kakitangan (KRAF) SMK Lajau yang bertemakan “Hawaii Sebiru SEMELA” itu diadakan bagimenghargai dan mengiktiraf kecemerlangan para guru dan staf sokongan sekolah sepanjang tahun 2017. Turut diraikan Majlis Jasamu Dikenang Encik Matnor Bin Daud yang akan berpindah keluar dan bertugas sebagai Penolong Kanan HEM di SM St Anne, Labuan.

Encik Mohd Jamatin Abd Latip, selaku Pengetua SMK Lajau menyempurnakan majlis yang turut dihadiri oleh Barisan Pentadbir SMK Lajau, SIP+ Encik Yusup Mohamad yang merupakan mantan pengetua. Encik Mohd Jamatin dalam ucapannya menyambut baik aktiviti dan program seperti itu kerana dapat memberi penghargaan kepada para guru dan kakitangan sokongan yang saling berganding bahu dalam

menyokong semua program dan aktiviti yang dianjurkan pihak sekolah sepanjang tahun ini.



Penyampaian Sijil Penghargaan Staff Of The Month oleh Pengetua, En.Mohd Jamatin

Encik Muhd Hisyam Assim, Pengerusi KRAF 2017 dalam ucapannya turut mengucapkan jutaan terima kasih atas kesungguhan guru-guru dan kerjasama daripada kakitangan sokongan sekolah kerana telah bertungkus lumus sepanjang tahun dalam menjayakan beberapa majlis seperti Sambutan Hari Guru, Majlis Perpisahan Puan Nor Tamah dan Majlis Perpisahan Mantan Pengetua Encik Yusup bin Mohamad.

Majlis Makan Malam Gemilang itu seumpama satu perjumpaan mesra yang lebih mengeratkan silaturahim sesama rakan sekerja selepas sibuk bekerja sepanjang tahun. Beliau turut mengharapkan agar AJK KRAF terus bersemangat menyumbang idea dan bersedia menyumbang keringat untuk tahun akan datang.

Majlis ini juga sebagai malam mengimbas kenangan En.Matnor yang telah menabur bakti menyiram keringat sepanjang berkhidmat di SMK Lajau. Seribu satu kenangan yang tercipta diharap menjadi titipan manis di kemudian hari kepada beliau. Hisyam juga membuktikan hubungan baik dan erat sesama rakan guru telah berjaya mengumpulkan

hadiah dan sumbangan untuk cabutan bertuah yang dijanjikan akan diperolehi oleh semua guru dan staf sokongan SMK Lajau.

Sejurus itu Encik Matnor bin Daud dijemput bagi menyampaikan ucapan ringkas sebagai tanda perpisahan. Antara petikan kata beliau, SMK Lajau adalah antara sekolah yang mempunyai disiplin yang baik, pencapaian murid yang cemerlang dan rakan-rakan kerja yang sangat membantu dalam tugas-tugas seharian sepanjang beliau bertugas di sekolah ini. Majlis diserikan lagi dengan penyampaian hadiah daripada KRAF, Koperasi SMK Lajau Bhd dan Bidang HEM sebagai tanda kenangan dan ingatan kepada beliau.



Penyampaian cenderamata kenangan daripada wakil KRAF SMK Lajau, Encik Muhd Hisyam, kepada Encik Matnor

Aturcara seterusnya Penyampaian sijil Staff Of The Month dikendalikan oleh AJK KRAF dengan kerjasama Bidang Kemanusiaan, SMK Lajau. Guru-guru dan kakitangan sokongan dinilai melalui beberapa kriteria seperti Kehadiran

Bertugas 100%, Penghantaran BRMG, Kecekapan Memberikan Pkhidmatan, Fail & BRLK Kokurikulum Lengkap, Kehadiran Guru dalam Aktiviti HRHK, Pencapaian Tiga Teratas Pasukan Bimbingan dan Inisiatif dan Kreativiti dalam Menjalankan Tugas.

Turut diraikan Sambutan Hari Lahir bagi guru-guru dan staf sokongan yang lahir pada bulan September, Oktober, November dan Disember. Acara kemuncak yang ditunggu-tunggu iaitu cabutan bertuah. Semasa acara ini KRAF telah menjemput pengetua, Barisan Pentadbir dan Ketua-Ketua Bidang bagi menyempunakan majlis. Sebanyak 63 cabutan untuk semua guru-guru dan staf yang hadir dan 3 cabutan Hadiah Utama telah dijalankan. Seperti mendapat durian runtuh, Encik Matnor bin Daud telah memenangi Hadiah Cabutan Utama iaitu wang tunai RM300.00.

Majlis gilang gemilang itu telah mendapat sumbangan berbentuk hamper, baucer, dan juga wang ringgit. Antara yang telah memberikan sumbangan adalah, Kelab Guru & kakitangan SMK Lajau (KRAF), Koperasi SMK Lajau Bhd, Syarikat Singer Sukaria Trading, Hotel Tiara Labuan, Syarikat Pirana Jaya Enterprise dan Persatuan Orang-Orang Istimewa Labuan (PBOIL).

Sumbangan turut diperolehi daripada orang perseorangan iaitu, Pn. Fatimah bt Hj. Yahya, En. Jasmi bin Sabtu, Pn. Jamiah bt Hj. Jamadil, Pn. Najihatusy Syahidah bt Ganden Lubis, Pn. Noraini bt Hj. Sabudin, Pn. Maslinda bt Musa, Pn. Mazihan bt Jusop, Pn. Nur Sazela bt Fahrudin, En. Isa bin Sidin, En. Linus @ Hafiz dan Pn. Huzaimah bt Khalid.

**Sumber Berita : SMK Lajau**



3 pemenang Hawaii Best Dress , Pn. Zurina,  
En.Jasmi dan Pn. Jalina

---

## **Program Transisi Tahun 1 SK Pekan Dua**





Pengarah Jabatan Pendidikan Labuan Raisin Saidin telah menyempurnakan Majlis Penutupan Program Transisi Tahun 1 Sekolah Kebangsaan Pekan Dua (SKPD) di Dewan Gemilang SK Pekan II, Selasa lalu.

Seramai 107 murid Tahun Satu terlibat dalam program itu yang bermula jam 8 pagi. Mereka mengikuti pelbagai aktiviti termasuk nyanyian, sukaneka, pertandingan membina akuarium, belajar abacus dan projek menanam taueh pada 3- 13 Januari lalu.

Murid- murid bersama guru- guru dan tetamu menyanyikan tiga lagu patriotik iaitu Negaraku, Wilayah Persekutuan Maju dan Sejahtera serta Gemilang disusuli bacaan doa oleh Ustaz Aska Achbar dan Bacaan Ikrar Murid oleh Mohamad Zakry Zaquan Shaiful Rizal.

Turut berucap pada majlis itu ialah Penolong Kanan Pentadbiran Hajah Tengku Yasmin Tengku Ibrahim yang mewakili Guru Besar Awgku Damit @Ak Chuchu Pengiran Mohd Yassin.

Selepas ucapan Raisin, majlis itu diserikan dengan persembahan Multimedia Minggu Transisi 2017, persembahan nyanyian solo murid dan penyampaian cenderahati transisi ( wakil ketua kelas dan penolong).

Turut diadakan, penyampaian hadiah pertandingan membina akuarium yang dimenangi Nur Soleha Delminda (1B), Mersa Elson (1B) dan Aedrey Reymil (1T).

Empat murid pula menerima hadiah Murid Contoh Mengikut Kelas iaitu Nur Syahirah Ramdhan Dzulfikar (1Z), Jimmy Jemsin (1T), Nur Nia Ramadhani Rhadmil (1B) dan Nur Felisyah Qedryna (1M).

Manakala Anugerah Murid Terbaik diberikan kepada Alexandra Hazel (1T) dan Mohamad Zakry Zaquan Shaiful Rizal (1Z).

Empatbelas murid Tahun Satu yang lahir pada bulan Januari turut teruja apabila pihak sekolah meraikan mereka dengan acara memotong kek sambil disaksikan ibu bapa dan guru-guru.

Mereka ialah Muhammad Aiyub Ismail ( 1Z), Nur Alissa Najira Abdul Taha ( 1Z), Nur Aqilah Damia Mohd Daud (1Z), Nur' Alya Dania Syafiqah Muhammad Shah ( 1Z), Putri Alisya Abdullah ( 1Z), Mohamad Adizan Masrin (1T), Nurul Hazira Nasip (1T), Adi Putra Isma Khairuddin Augustine Abdullah ( 1B), Al-Fazeer Abdullah (1B), Muhammad Alif Mukhriz Abdul Mukim (1B), Nazrin Raja (1B), Nurul Syazwanie Abdullah ( 1B), Mohammad Firdaus Mat Sam (1M).

Majlis itu diakhiri dengan persembahan murid, Madley Pokok Mulberry dan 5 Buku serta sesi bergambar.

Selepas rehat, ibu bapa mendengar Taklimat KSSR Semakan 2017 oleh Penyelia Unit Sains dan Matematik Irham Hamid dan Program Bakti Linus Tahun 1 oleh Ketua Unit Linus Afandi Nasir.

Raisin berharap ibubapa akan terus memberikan kerjasama kepada pihak termasuk memastikan kehadiran penuh anak mereka ke sekolah selain hadir pada program anjuran sekolah dan PIBG.

*“Sudah tentu pihak sekolah memerlukan kerjasama dan komitmen ibu bapa dalam menjayakan program anjuran sekolah dan PIBG”, Encik Raisin Saidin.*

Beliau turut mengucapkan terima kasih atas komitmen guru-guru yang menjayakan pelbagai program sepanjang tahun lalu.

Sementara itu, Tengku Yasmin merakamkan ucapan terima kasih kepada ibu bapa yang memilih SK Pekan Dua sebagai pilihan mereka menghantar anak ke Tahun Satu sekaligus menjayakan slogan sekolah ‘Labuan Hebat, SK Pekan Dua Gemilang’.

“Program transisi adalah untuk memberikan pengalaman awal kepada murid agar mereka lebih yakin dan berdisiplin sepanjang tahun 2017,” katanya.

Turut hadir, Ketua Unit HEM Haji Jaafar Abu Bakar, Penolong Kanan HEM Sabar Dalimin dan Penolong Kanan Kokurikulum Rahman Jaafar.